

年修真累歲故得內外相應服草有功豈不是延年出世耶爾凡流者不知至道貪愛不休惟積玉堆金是為世樂恣驕奢侈疊疊相矜無一日不闢滋味無一日不顧綺羅七竅長流三田不固任是萬般靈藥餌服何為豈能出世也子依吾說大道匪遙真境必達光元曰偶因登說獲遇真人不外凡愚幽玄盡付恩深天地匪言可謂今欲營其藥類擬入名山燒制未知可乎曰此道至大至神子宜至保若漏天機不惟殃爾七祖即滅爾身切在秘藏勿與非人言論交遊也此山雖是名嶽且近大都令值兵革方興此山當道多人窟伏不可制造神丹吳越江浙名山甚多或羅浮茅嶺廬嶽天台目下並安後亦無事乃是羣賢栖依之地衆聖所游之方子宜往彼以制大丹定是出世吾之所論悉無謬辭子宜秘保光元曰恩深渤海荷重丘山一介微人將何以報曰爾之有分濟會如茲吾見世人擾擾悉貪榮祿盡愛繁華喪朴俄然皆死吾甚悼此輩也將吾所論錄成方冊接引有

分之人即是報吾吾亦願也光元感極默爾無言先生曰子久於海上曾飲元酒否曰不識元酒先生遂解杖頭瓢與光元汲水先生以藥投瓢中木葉蓋之逡巡成酒紅紫色香味非常先生自飲一杯餘令光元併飲訖精神頓爽乃再拜而謝之先生指曰日已暮汝且歸吾所止只在峯南無事却來言訖遂行片雲瞥然蹤跡已失光元遂歸寺舍明日直過峯南以尋先生逕路皆迷迨至峯南全無逕路白雲飛鳥澗水猿聲而已殊不見人乃知先生非居凡也悵悵再三謹錄以成一卷達士君子幸細詳之也

海客論

二篇同卷

悟玄篇

太虛心淵篇

別六

悟玄篇序

蓋人生於天地之間秉受陰陽之氣故曰有死生為人者可鬼可仙鬼者純陰之氣仙者純陽之體以陰鍊陽甚易以陽鍊陰不難所謂學仙之士無過以陽鍊陰之術陰盡陽純則曰仙矣鍊陰有法進火有數退符有節夫人身中一竅名曰玄牝若人明得此竅則三才萬物悉備於我矣此之一竅非泥於物也其理別無他術止不過忘形滅念如守其中矣久久純熟中宮靜極則身中陽氣自然生也陽氣漸生陰氣漸剝乃曰陽長陰消之意矣予於古抗得受師傳天機不隱故以鄙句盡心泄漏於此矣使學仙之士幸垂一覽同登道岸非豈異於我哉歲在己丑夏月朔日余洞真序